

Les plus anciens documents linguistiques de la France

Corpus : (chOise)

Responsable du corpus : -

Édition de la charte : -

ChOise176

Édition critique

1282, octobre

Type de document: lettres: vente

Objet: Vente par Isabelle de Morlemont à Florent et Jean de Laboissière, frères, chanoines de Noyon, de vingt-neuf journaux et demi de terre et de diverses rentes à Y et aux alentours, mouvant du chapitre de Noyon, — pour le prix de cent trente-cinq livres parisis.

Auteur: Isabelle de Morlemont

Sceau: scellé sur large double queue de parchemin. Sceau brisé de cire verte oxydée; en amande

Bénéficiaire: Florent et Jean de Laboissière, chanoines de Noyon

Rédacteur: ##

Scribe: #####

Support: Parchemin. Grande marge en haut; marge à gauche et à droite. Traces de mine de plomb pour la réglure et pour les marges

Lieu de conservation: AD Oise G1450; Chapitre cathédral de Noyon, dossier Y^[a]

Transcription de la charte

1 A tous chiaus qui ches presentes lettres verront et horront , je Ysabiaus de Mollemont , salut en Nostre Segneur · Sachent tout que je , en me veeue et en \2 men plain pooir , ai vendu bien et loialment et pour juste pris , s'il est asavoir pour sis vins et quinze livres de paresis , qui me sont bien paiét en de\3niers contés de boine monnoie loial , a homes honerables et discrés Flourent et Jehan de le Boissiere , freres *et* chanoines de Noion , vint et noeuf journeus *et* demi [4] de tere , peu plus ou peu mains , qui sont tenu du chapitre de Noion , seans en le mairie Ogier , si *comme* ele s'estent , ou teroir de Y *et* es teroirs d'ileuc entour , \4 s'il est asavoir : au vauchel de le voie de Matheni , dis journeus trente et trois vergues *et* demie ; d'autre part le voie en che meesme vauchel , un journal , chiunc \5 vergues *et* demie ; a le voie d'Escanlli , trois journeus *et* sept vergues ; a chele meesme voie d'Escanlli , un journal ; au val del Ercheul , quatre journeus *et* seze vergues ; au bus \6 Raoul le Maiheur , deus journeus , deus vergues *et* demie mains ; au Pelerin , deus journeus *et* demi , trois vergues *et* demie mains ; au Peteriau Markais , un journal *et* une vergue ; \7 au bus Jehan Estournel , chiunc quarterons *et* demi ; au Prier , vint et wuit vergues *et* demie ; as ruates desous Crois , un journal , une vergue mains ; as ruates a Mon - \8 - chiaus , un journal ; a l'ourme entre Crois *et* Matheni , un journal wuit vergues mains · Derechief j'ai vendu as devantdis Flourent *et* Jehan chiunquante *et* wuit deniers \9 parisés , chiunc capons *et* un sestier de blé de rente chascun an assenés a prendre , s'il est asavoir : sur le manoir Symon Robart , quarante deniers *et* un capon ; sur le manoir \10 Mahiu Coustant , douze deniers , deus capons *et* deus tiercherons de blé ; sur le manoir Faguet , un capon , siz deniers *et* un tiercheron de blé ; sur le manoir Oudart Lorel , un

capon · \11 Les queles teres , denier , capon *et* blé *apartenoient* a moi par raison de aumosne faite a moi de Raoul de Brethaucourt *et* de demoisele Agnés , se feme , a tenir des \12 ore en avant a tous jours quittement *et* en pais des devantdis Flourent *et* Jehan , ou de leur oirs , ou de leur successeurs , ou de chiaus *qui* aroient cause de iaus , en \13 toutes ches choses devant - dites *et* en chascune de eles vendues · *Et* promech que encontre che vendage devantdit je ne venrai par moi ne par autrui , ne ne quer\14rai arch ni engien , par coi chil devantdit frere Flourens *et* Jehans , ou chil *qui* aront cause de iaus en ches choses , soient grevé ne traveillié ni apelé en nul ju \15gement par devant aucun juge de Sainte Eglise ou de laie justiche , anchois leur porterai loial warandie a tous jours envers tous chiaus *qui* a droit *et* a loi \16 en vaurroient venir , hors mis le doien *et* le chapitre de Noion · *Et* a toutes ches choses *et* chascune de eles fermement a tenir a tous jours , oblige je par le foi \17 de men cors envers ichiaus Flourent *et* Jehan , *et* tous chiaus *qui* aront cause de iaus en ches choses vendues , moi , mes oirs , mes successeurs *et* tous mes biens \18 presens *et* avenir · *Et* renonche *et* ai renonchié en che vendage a tous indulgences , a tous privileges de crois *et* autres empetrés ou a empetrer , a toutes \19 exceptions , bares *et* deffenses de droit ou de fait *qui* aidier me porroient *et* chiaus Flourent *et* Jehan , ou chiaus *qui* aroient cause de iaus en ches cho\20ses , nuire · *Et* pour che que che soit ferme chose *et* estable a tous jours , j'ai ches presentes lettres seelees de men propre seel *et* baillies as devantdis Flourent \21 *et* Jehan , les queles furent faites *et* donnees en l'an del incarnation Nostre Segneur mil deus chens quatrevins *et* deus , ou mois de octobre ·

^[a] Cf. CB 1964, 230s., note 4.